

Andrés Solar Santurio

Deva (Xixón),
25/08/1955 – 27/12/1984

Ta consideráu ún de los meyores escritores del Surdimientu. Nel añu 1978 entró en Conceyu Bable y entamó a publicar artículos na secció que tenía l'asociación nel diariu El Comerci, *Alitar Asturias*. Col correr de los años, ganó dellos premios lliterarios como'l Premiu de Cuentos Curtios del Institutu Jerónimo

González de Sama (Llangréu) en 1979 y 1980, el Segundu Concurso de Narraciones Curties n'asturianu entamáu pola Diputación d' Asturias (1981), el Concurso de Cuentos n'asturianu del Club Cultura d'Uviéu (1982) o el Primer Concurso de Cuentos del Conceyu de Llanes (1984).

Dientro de la so obra lliteraria alcontramos cuentos curtios pero tamién poemas, cuentos llargos, novela curtia y ensayos. Grupos como Dixebra o Skama la Rede punxeron música a poemas d'Andrés Solar.

En 1983 nomáronlu académicu de Númberu de l'Academia de la Llingua Asturiana, cargu que rechazó por tar "pocu estudiáu". Amás, esi mesmu añu participó na creación de la Xunta d'Escritores Asturianos. Y foi de los primeros en poner clas de llingua asturiana na Universidá Popular de Xixón.

Morrió en 1984, con 29 años, nun accidente de tráficu. Ente los actos pa facer acordanza de la so figura destaquen los Premios Andrés Solar (creaos pola Xunta pola Defensa de la Llingua Asturiana en 1985), el llibru publicáu pola ALLA onde se recueyen les sos obres inédites, la esposición "Andrés Solar: el llabrador de pallabres" fecha pola Fundación Municipal de Cultura de Xixón o la XXV Selmana de les Lletres Asturianas, dedicada a esti autor.



II PREMIU DE NOVELA CURTIA Andrés Solar Santurio 2022



D.L.I. AS 01679-2022

www.juangallego.com

Juan Gallego Diseño

Xixón | Cultura y Educación



CONVOCATORIA Y BASES

II PREMIU DE NOVELA CURTIA

Andrés Solar Santurio

2022

LA CONCEYALÍA DE CULTURA, NEL SO ENFOTU POR FAVORECER Y PROMOVER LA CREACIÓN LLITERARIA N'ASTURIANU Y AL TIEMPU FACER ALCORDANZA DE LA FIGURA DEL ESCRITOR XIXONÉS ANDRÉS SOLAR SANTURIO Y LA SO QUERENCIA POLA LINGUA DE NUESO Y LA SO NORMALIZACIÓN SOCIAL, CONVOCA LA SEGUNDA EDICIÓN DEL PREMIU DE NOVELA CURTIA ANDRÉS SOLAR SANTURIO.

Xixón | Cultura
y Educación

BASES DE LA CONVOCATORIA

1 Van poder optar al "PREMIU DE NOVELA CURTIA ANDRÉS SOLAR SANTURIO" les obres inédites escrites en llingua asturiana que nun se premiaren enantes en nengún otu concursu. Los y les autores van responder de l'autoría y orixinalidá de la novela que presenten al premiu y de que nun ye copia nin modificación d'obra ayena.

2 Les obres habrán tener una estensión mínima de 75 páxines y una estensión máxima de 130 páxines. Habrán presentase en DIN A4 (210 x 297 mm.) mecanografíaes a doble espaciu per una cara y cuerpu de lletra Times New Roman 12 o asemeyáu.

3 Les obres presentaes han tar escrites acordies coles normes ortográfiques de l'Academia de la Llingua Asturiana. De nun se cumplir esti requisitu, nun van tener opción a premiu.

4 La presentación d'orixinales va poder facese de dos maneres:

a. Al traviés d'Internet.

Les noveles pal Premiu habrán presentase al traviés del corréu electrónicu: llinguaasturiana@xixon.es

Forma de presentación: Nel asuntu hai qu'indicar "PREMIU DE NOVELA CURTIA ANDRÉS SOLAR SANTURIO 2022". Nel cuerpu del mensaxe hai qu'incluyir el títulu de la novela y el nomatu del autor o autora. Amás, nel corréu hai qu'incluyir un documentu axuntu (.pdf) cola novela y otu (.pdf) -aparte- colos datos personales: nome, apellíos, señes, teléfonu y corréu electrónicu.

b. Per corréu postal.

Van remitise 2 sobres nos qu'ha venir el nome del premiu "PREMIU DE NOVELA CURTIA ANDRÉS SOLAR SANTURIO", y tamién el títulu de la obra y el nomatu del autor o autora. Cada sobre ha contener:

Sobre A: datos del autor o autora (nome y apellíos, señes y teléfonu).

Sobre B: Orixinal y 3 copies del testu.

A estes señes:
Rexistru de la Fundación Municipal de Cultura, Educación y Universidá Popular
C/ Xovellanos, 21 • 33201 Xixón – Asturias

5 El plazu de presentación d'orixinales entama al día siguiente de la publicación d'estes bases nel BOPA y remata'l 26 de setiembre de 2022, Día européu de les llingües, almitiéndose, sicasí, los que tengan matasellos de correos d'esi mesmu día.

6 El xuráu, compuestu por persones venceyaes al mundu de les lletres asturianas, va designalu la Conceyalía Delegada de Cultura del Conceyu de Xixón. Va actuar como Secretaria la Responsable de la Oficina de Normalización Llingüística del Conceyu de Xixón. La so composición va dase a conocer cuando se produza'l fallu, que va facese públicu n'avientu de 2022 (coincidiendo col cabu d'añu d'Andrés Solar Santurio) y la so decisión va ser inapelable.

7 El premiu podrá declarase ermú si'l xuráu considera que la calidá de les obres asina lo aconseya.

8 La cuantía del "PREMIU DE NOVELA CURTIA ANDRÉS SOLAR" ye de 3.000 €, aportaos pol Conceyu de Xixón pa la obra que por unanimidá o nel so defectu, pola mayoría de los votos del xuráu, tenga los méritos ma-

yores. Esta cantidá va llevar una retención de 15% en conceutu de tributos al Estáu. Esta cantidá nun va suponer en nengún casu la cesión o limitación de los derechos de propiedá de la obra premiada, incluyíos los derivaos de la propiedá intelectual.

9 El Conceyu de Xixón resérvase'l derechu de publicar n'esclusiva la primer edición de la obra premiada, dando por retribuyíos col premiu los derechos d'autor d'esta primer edición.

10 Los orixinales presentaos al concursu van devolvese si l'autor o autora lo solicita nos dos meses siguientes al fallu del xuráu. Les obres que nun se reclamen per escrito primero del 28 de febreru de 2023 y col xustificante de la Oficina Virtual de Correos qu'acrite l'autoría van destruyise.

11 La convocatoria del premiu va facese al traviés del BOPA y de la páxina web del Conceyu de Xixón y n'otres publicaciones culturales.

12 La participación nesti concursu implica l'aceutación de toes y caúna de les bases.